

四庫全書

集部

欽定四庫全書

石倉歷代詩選卷十七

明 曹學佺 編

初唐四

王勃

字子安絳州龍門人  
文中子通孫也

上巳浮江宴韻得陟字

披觀玉京路駐賞金臺陟逸興懷九仙  
良辰傾四美松吟白雲際桂馥清溪裏  
別有江海心日暮情何已

春日宴樂遊園賦韻得接字

帝里寒光盡神臯春望浹梅郊落晚英柳甸驚初葉流水抽奇弄崩雲灑芳牒清尊湛不空暫喜平生接

山亭夜宴

桂宇幽襟積松臺涼夜永森沈野逕寒肅穆巖扉靜竹晦南阿色荷翻北潭影清興殊未闌林端照初景

詠風

肅肅涼風生加我林壑清驅煙尋磴戶卷霧出山楹去

來固無跡動息如有情  
日落山水靜為君起松聲

懷仙 并序

客有自幽山來者啓予以林壑之事而煙霞在焉  
思解纓紱永詠山水神與道超跡為形滯故書其  
事

鶴岑有奇徑麟洲富仙家  
紫泉漱珠液玄巖列丹葩  
常希披塵網眇然登雲車  
鸞情極霄漢鳳想疲煙霞  
道存蓬瀛近意愜朝市  
賒無為坐惆悵虛此江上華

忽夢遊仙

僕本江上客牽跡在方內寤寐霄漢間居然有靈對翕  
爾登霞首依然躡雲背電策驅龍光煙途儼鸞態乘月  
披金帔連星解瓊珮浮識俄易歸真遊邈難再寥廓沈  
遐思周遑奉遺誨流俗非我鄉何當釋塵昧

滕王閣

滕王高閣臨江渚佩玉鳴鸞罷歌舞畫棟朝飛南浦雲  
珠簾暮捲西山雨閒雲潭影日悠悠物換星移幾度秋

閣中帝子今何在檻外長江空自流

寒夜懷友人

北山煙霧始茫茫南津霜月正蒼蒼  
秋深客思紛無已復值征鴻中夜起

復閣重樓向浦開秋風明月度江來  
故人故情懷故宴相望相思不相見

江南弄

江南弄巫山連楚夢行雨行雲幾相送  
瑤軒金谷上春

時玉童仙女無見期紫霧香煙眇難託清風明月遙相思遙相思草徒綠聽雙飛鳳凰曲

秋夜長

秋夜長殊未央月明露白澄清光層城綺閣遙相望遙相望川無梁北風受節南雁翔崇蘭委質時菊芳鳴環曳珮出長廊為君秋夜擣衣裳織羅對鳳凰丹綺雙鴛鴦調砧亂杵思自傷思自傷征夫萬里戍他鄉鶴關音信斷龍門道路長君在天一方寒衣徒自香

採蓮曲

採蓮歸綠水芙蓉衣秋風起浪鳬雁飛桂棹蘭橈下長  
浦羅裙玉腕輕搖櫓葉嶼花潭極望平江謳越吹相思  
苦相思苦佳期不可駐塞外征夫猶未還江南採蓮今  
已暮今已暮採蓮花渠今那必盡娼家官道城南把桑  
葉何如江上採蓮花蓮花復蓮花花葉何稠疊葉翠本  
羞眉花紅強似頰佳人不在茲悵望別離時牽花憐共  
蒂折藕愛連絲故情無處所新物徒華滋不惜西津交



珮解還羞北海雁書遲採蓮歌有節採蓮夜未歇正逢  
浩蕩江上風又值徘徊江上月徘徊蓮浦夜相逢吳姬  
越女何丰茸共問寒光千里外征客關山路幾重

臨高臺

臨高臺高臺迢迢絕浮埃瑤軒綺構何崔嵬驚歌鳳吹  
清且哀俯瞰長安道萋萋御溝草斜對甘泉路蒼蒼茂  
陵樹高臺四望同帝鄉佳氣鬱葱葱紫閣丹樓紛照耀  
璧房錦殿相玲瓏東迷長樂觀西指未央宮赤城映朝

日綠樹搖春風旗亭百隊開新市  
甲第千甍分戚里朱輪翠蓋不勝春  
疊榭層楹相對起復有青樓大道中  
繡戶文窓雕綺櫳錦衾夜不褰羅帷  
晝未空歌屏朝掩翠妝鏡照窺紅  
為君開寶髻蛾眉罷花叢塵間狹路  
黯將暮雲開月色明如素鴛鴦池上  
兩兩飛鳳凰樓下雙雙度物色正如  
此佳期那不顧銀鞍繡轂盛繁華可  
憐今夜宿娼家娼家少婦不須顰東  
園桃李片時春君看舊日高臺處柏  
梁銅雀生黃塵

落花落

落花落落花紛漠漠綠葉青跼映丹萼與君徘徊上金  
閣影拂妝階玳瑁筵香飄舞館茱萸幙落花飛撩亂入  
中帷落花春正滿春人歸不歸落花度氛氲遶高樹落  
花春已繁春人春不顧綺閣青臺靜且閒羅袂紅巾復  
往還盛年不再得高枝難重攀試復旦遊落花裏暮宿  
落花間與君落花院臺上起雙鬟

銅雀妓

金鳳鄰銅雀漳河望鄴城君王無處所臺榭若平生舞  
席紛何就歌梁儼未傾西陵松檟冷誰見綺羅情

聖泉宴

并序

玄武山有聖泉焉浸淫歷數百千年來巖泌湧接  
磴分流下瞰長江沙堤石岼咸古人遺跡也茲乃  
青蘋綠芰紫苔蒼蘚遂使江湖思遠寤寐寄託既  
而崇巒左岵石壑前榮丹嶸萬尋碧潭千頃松風  
唱響竹露薰空瀟瀟乎人間之難遇也方欲以林

壑為天屬琴樽為日用嗟乎古今共逝方深山上  
之悲少長同遊且盡山陰之樂盍題芳什共寫高  
情詩得泉字

披襟乘石磴列籍俯春泉蘭氣薰山酌松聲韻野絃影  
飄垂葉外香度落花前興洽林塘晚重巖起夕煙

尋道觀

芝廬光分野蓬闕盛規模碧壇清桂闕丹洞肅松樞玉  
笈三山記金箱五嶽圖蒼虬不可見空望白雲衢

散關晨度

關山凌旦開石路無塵埃白馬高譚去青牛真氣來重  
門臨巨壑連棟起崇隈即今揚策度非是棄繻回

別薛華

送送多窮路遑遑獨問津悲涼千里道悽斷百年身心  
事同漂泊生涯共苦辛無論去與住俱是夢中人

重別薛華

明月沈珠浦秋風濯錦川樓臺臨絕岼洲渚亘長天旅

泊成千里棲遑共百年窮途惟有淚還望獨潛然

遊梵宇三覺寺

香閣披青磴瑤臺控紫岑葉齊山路狹花積野壇深蘿  
幌棲禪影松門聽梵音遽欣陪妙躅延賞滌煩襟

麻平晚行

百年懷土望千里倦遊情高低尋成道遠近聽泉聲  
葉纔分色山花不辨名羈心何處盡風急暮猿清

送盧主簿

窮途非所恨，虛室自相依。  
城闕居年滿，琴樽俗事稀。  
開襟方未已，分袂忽多違。  
東巖富松竹，歲暮幸同歸。

餞韋兵曹

征驂臨野次，別袂慘江垂。  
川霽浮煙歛，山明落照移。  
鷹風凋晚葉，蟬露泣秋枝。  
亭臯分遠望，延想間雲涯。

白下驛餞唐少府

下驛窮交日，昌亭旅食年。  
相知何用早，懷抱即依然。  
浦樓低晚照，鄉路隔風煙。  
去去如何道，長安在日邊。



杜少府之任蜀州

城闕輔三秦，風煙望五津。  
與君離別意，同是宦遊人。  
海內存知己，天涯若比鄰。  
無為在岐路，兒女共霑巾。

仲春郊外

東園垂柳徑，西堰落花津。  
物色連三月，風光絕四鄰。  
鳥飛村覺曙，魚戲水知春。  
初晴山院裏，何處染蠶塵。

郊興

空園歌獨酌，春日賦閒居。  
澤蘭侵小徑，河柳覆長渠。  
雨

去花光濕風歸葉影疎山人不惜醉惟畏綠樽虛

郊園即事

煙霞春旦賞松竹故年心  
斷山疑畫障懸溜瀉鳴琴草  
徧南亭合花濃北院深  
閒居饒酒賦隨興欲抽簪

山居晚眺贈王道士

金壇疎俗宇玉洞侶仙羣  
花枝棲晚露峰葉度晴雲  
斜照移山影迴沙擁溜文  
琴樽方待興竹樹已迎曛

春日還郊

閒情兼默語攜杖赴巖泉  
草綠紫新帶榆青綴古錢  
魚牀侵岼水鳥路入山煙  
還題平子賦花樹滿春田

對酒春園作

投簪下山閣攜酒對河梁  
狹水牽長鏡高花送斷香  
繁鶯歌似曲疎蝶舞成行  
自然催一醉非但閱年光

觀內懷仙

玉架殘書隱金壇舊跡迷  
牽花尋紫洞步葉下清谿  
瓊漿猶類乳石髓尚如泥  
自能成羽翼何必仰雲梯

秋日別王長史

別路長千里深恩重百年正悲西候日更動北梁篇野  
色籠寒霧山光斂暮煙終知難再奉懷德自潛然

上巳浮江宴韻得遙字

上巳年光促中川興緒遙綠齊山葉滿紅洩岸花銷泉  
聲喧後碣虹影照前橋遽悲春望遠江路積波潮

長柳

晨征犯煙磴夕憩在雲闕晚風清近壑新月照澄灣郊

童樵唱返津吏釣歌還客行無與晤賴此釋愁顏

羈遊餞別

客心懸隴路遊子倦江干  
槿豐朝砌靜篠密夜窓寒  
琴聲銷別恨風景駐離歡  
寧竟山川遠悠悠旅思難

易陽早發

飭裝侵曉月奔策候殘星  
危閣尋丹嶂迴梁屬翠屏  
雲間迷樹影霧裏失峰形  
復此涼颼至空山飛夜螢

焦岸早行和陸四

侵星違旅館乘月戒征儔  
複嶂迷晴色虛巖辨暗流  
猿吟山漏曉螢散野風秋  
故人渺何際鄉關雲霧浮

深灣夜宿

津途臨巨壑村宇架危岑  
堰絕灘聲隱峰交樹影深  
江童暮理楫山女夜調砧  
此時故鄉遠寧知遊子心

傷裴錄事喪子

蘭堦霜候早松路空臺深  
魄散珠胎沒芳銷玉樹沈  
露文晞宿草煙照慘平林  
芝焚空嘆息流恨滿簾金

泥谿

弭棹凌奔壑，低鞭躡峻岐。  
江濤出岸險，峰磴入雲危。  
溜急船文亂，巖斜騎影移。  
水煙籠翠渚，山照落丹崖。  
風生蘋浦葉，露泣竹潭枝。  
泛水雖云美，勞歌誰復知。

秋日仙遊觀贈道士

石圖分帝宇，銀牒洞靈宮。  
迴丹縈岫室，複翠上巖櫳。  
霧濃金竈靜，雲暗玉壇空。  
野花常捧露，山葉自吟風。  
林泉明月在，詩酒故人同。  
待余逢石髓，從爾命飛鴻。

出境遊山二首

源水終無路山阿若有人驅羊先動石走兔欲投巾  
洞晚秋泉冷巖朝古樹新峰斜連鳥翅磴疊上魚鱗  
化鶴千齡早元龜六代春浮雲今可駕滄海自成塵

振翮凌霜吹正月佇天濤回鑣凌翠壑飛軫控青岑  
巖深靈竈沒澗毀石渠沈宮闕雲間近江山物外臨  
玉壇棲暮夜珠洞結秋陰蕭蕭離俗影擾擾望鄉心  
誰意山遊好屢傷人事侵



三月曲水宴

彭澤官初去河陽賦始傳田園歸舊國詩酒間長筵列  
室窺丹洞分樓瞰紫煙縈迴亘津渡出沒控郊鄧鳳琴  
調上客龍轡儼羣仙松石偏宜古藤蘿不記年重簷交  
密樹複磴擁危泉抗石晞南嶺乘沙眇北川傳巖來築  
處磻溪入釣前日斜真趣遠幽思夢涼蟬

晚屆鳳州

寶雞辭舊域仙鳳歷遺墟去此近城闕青山明月初

羈春

客心千里倦春事一朝歸還傷北園裏重見落花飛

林塘懷友

芳屏畫春草仙杼織朝霞何如山水路對面即飛花

山扉夜坐

抱琴開野室攜酒對情人林塘花月下別是一家春

春莊

山中蘭葉徑城外李桃園直知人事靜不覺鳥聲喧

春遊

客念紛無極春淚倍成行  
今朝花樹下不覺戀年光

春園

山泉兩處晚花柳一園春  
還持十日醉共作百年人

林泉獨飲

丘壑經塗賞花柳遇時春  
相逢今不醉物色自輕人

他鄉叙興

綴葉歸煙晚乘花落照春  
邊城琴酒處俱是越鄉人

夜興

野煙含夕渚山月照秋林還將中散興來偶步兵琴

臨江二首

泛泛東流水飛飛北上塵歸驂將別棹俱是倦遊人  
去驂嘶別路歸棹隱寒洲江皋木葉下應是故城秋

江亭夜月送別二首

江送巴南水山橫塞北雲津亭秋月夜誰見泣離羣  
亂煙籠碧砌飛月向南端寂寂離亭掩江山此夜寒

別人

久客逢餘閨他鄉別故人自然堪下淚誰忍望征塵  
江上風煙積山幽雲霧多送君南浦外還望將如何

贈李十四

亂竹開三徑飛花滿四鄰從來揚子宅別有尚玄人

早春野望

江曠春潮白山長曉岫青他鄉臨眺極花柳映邊亭

山中

長江悲已滯萬里念將歸況屬高風晚山山黃葉飛

冬郊行望

桂密巖花白梨疎林葉紅江臯寒望盡歸念斷征蓬

寒夜思友二首

雲間征思斷月下歸愁切鴻雁西南飛如何故人別  
朝朝翠山下夜夜蒼江曲復此遙相思清樽湛芳綠

始平晚息

觀闕長安近江山蜀道賒客行朝復夕無處是鄉家

扶風晝屈離京浸遠

帝里金莖去扶風石柱來山川殊未已行路方悠哉

普安建陰題壁

江漢深無極梁岷不可攀山川雲霧裏遊子幾時還

九日

九日重陽節開門有菊花不知來送酒若箇是陶家

秋江送別

早是他鄉值早秋江亭明月帶江流已覺逝川傷別念

復看津樹隱離舟

蜀中九日登玄武山旅眺

九月九日望鄉臺他席他鄉送客杯  
人今已厭南中苦鴻雁那從北地來

河陽橋代竇郎中佳人答楊中舍

披風聽鳥長河路臨津織女遙相妬  
判知秋夕帶啼還那及春朝攜手度



石倉歷代詩選卷十七

欽定四庫全書

石倉歷代詩選卷十八

明 曹學佺 編

初唐五

楊炯 華陰人

廣谿峽

廣谿三峽首曠望兼川陸山路遶羊腸江城鎮魚復喬  
林百丈偃飛水千尋瀑驚浪廻高天盤渦轉深谷漢氏

昔云季中原爭逐鹿天下有英雄襄陽自龍伏常山集  
軍旅永安興板築池臺忽已傾邦家遽淪覆庸才若劉  
禪忠佐為心腹設險猶可存當無賈生哭

巫峽

三峽七百里惟言巫峽長重巖宵不極疊嶂凌蒼蒼絕  
壁橫天險莓苔爛錦章入夜分明見無風波浪狂忠信  
吾所蹈泛舟亦何傷可以涉砥柱可以浮呂梁美人今  
何在靈芝徒有芳山空夜猿嘯征客淚沾裳

西陵峽

絕壁聳萬仞長波射千里盤薄荆之門滔滔南國紀楚  
都昔全盛高丘烜望祀秦兵一旦侵夷陵火潜起四維  
不復設關塞良難恃洞庭且忽焉孟門終已矣自古天  
地闢流為峽中水行旅相贈言風濤無極已及余踐斯  
地瓌竒信為美江山若有靈千載伸知己

從軍行

烽火照西京心中自不平牙章辭鳳闕鐵騎繞龍城雪

暗凋旗畫風多雜鼓聲寧為百夫長勝作一書生

劉生

卿家本六郡年長入三秦白璧酬知己黃金謝主人  
劍鋒生赤電馬足起紅塵日暮歌鐘發喧喧動四鄰

驄馬

驄馬鐵連錢長安俠少年帝畿平若水官路直如弦  
夜玉妝車岫秋金鑄馬鞭風霜但自保窮達任皇天

出塞

塞外欲紛紜雄猶未分明堂占氣色華蓋辨星文二月河魁將三千太乙軍丈夫皆有志會見立功勲

有所思

賤妾留南楚征夫向北燕三秋方一日少別比千年不掩嚬紅縷無論數綠錢相思明月夜迢遞白雲天

梅花落

窻外一株梅寒花五出開影隨朝日遠香逐便風來泣對銅鈎障愁看玉鏡臺行人斷消息春恨幾徘徊

折楊柳

邊地遙無極  
征人去不還  
秋容凋翠羽  
別淚損紅顏  
望斷流星驛  
心馳明月關  
藁砧何處在  
楊柳自堪攀

紫騮馬

俠客重周遊  
金鞭控紫騮  
蛇弓白羽箭  
鶴轡赤茸鞦  
發跡來南海  
長鳴向北州  
匈奴今未滅  
畫地取封侯

戰城南

塞北途遼遠  
城南戰苦辛  
旂旗如鳥翼  
甲冑似魚鱗  
凍

水寒傷馬悲風愁殺人寸心明白日千里暗紅塵

送臨津房少府

岐路三秋別江津萬里長煙霞駐征蓋弦奏促飛觴  
樹含斜日池風泛草涼贈言未終竟流涕忽霑裳

送豐城王少府

愁結亂如麻長天照落霞離亭隱喬樹溝水浸平沙  
左尉才何屈東闕望漸賒行看轉牛斗持此報張華

送鄭州周司空



漢國臨清渭京城枕濁河居人下珠淚  
宿御促驪歌望極關山遠秋深煙霧多  
惟餘三五夕明月暫經過

送梓州周司功

御溝一相送征馬屢盤桓言笑方無日  
離憂獨未寬舉杯聊勸酒破涕暫為歡  
別後風清夜思君蜀路難

送楊處士反初卜居曲江

雁門歸去遠垂老脫袈裟蕭寺休為客  
曹谿便寄家綠琪千歲樹黃槿四時花  
別怨應無限門前桂水斜

遊廢觀

青嶂倚丹田荒涼數百年猶知小山桂尚識大羅天  
樂敗金爐火苔昏王女泉歲時無壁畫朝夕有階煙  
花柳三春節江山四望懸悠然出塵網從此狎神仙

和石侍御山莊

煙霞非俗宇巖壑只幽居水浸何曾畎郊荒不復鋤  
影濃山樹密香淺澤花踈濶塹防斜徑平堤夾小渠  
蓮房若箇實竹節幾重虛蕭然隔城市酌醴焚枯魚

送李庶子致仕還洛

此地傾城日由來供帳華亭逢李廣騎門接邵平  
中原野煙氛匝關河遊望賒白雲斷巖岫綠草覆江沙  
詔賜扶陽宅人榮御史車灞池一相送流涕向煙霞

早行

敞朗東方徹闌干北斗斜地氣俄成霧天雲漸作霞  
河流纔辨馬巖路不容車阡陌經三歲閭閻對五家  
露文沾細草風影轉高花日月從來惜關山猶自賒

和崔司空傷姬人

昔時南浦別鶴怨寶琴弦今日東方主鸞銷珠鏡前水  
流銜砌咽月影向窓懸妝匣棲餘粉薰爐滅舊煙晚庭  
摧玉樹寒帳委金蓮佳人不再得雲日幾千年

和騫右丞省中暮望

故事閒臺閣仙門藹已深舊章窺複道雲幌肅重陰玄  
律葭灰變青陽斗柄臨年光搖樹色春氣繞蘭心風響  
高窓度流痕曲岸侵天明總樞轄人鏡辨衣簪日暮南

宮靜瑤華振雅音

和酬虢州李司法

唇齒標形勝關河壯邑居寒山抵方伯秋水面鴻臚君  
子從遊宦忘情任卷舒風霜下刀筆軒蓋擁門閭平野  
芸黃遍長洲鴻雁初菊花宜泛酒浦葉好裁書昔我芝  
蘭契悠然雲雨踈非君重千里誰肯惠雙魚

和鄭讐校內省眺矚思鄉懷友

銅門初下辟石館始沈研遊霧千金字飛雲五色牋樓

臺橫紫極城闕俯青田  
暄入瑤房裏春迴玉宇前  
霞文埋落照風物澹歸煙  
翰墨三餘隙關山四望懸  
顏峰暎酌羽流水曠鳴弦  
雖欣承白雪終恨隔青天

夜送趙縱

趙氏連城壁由來天下傳  
送君還舊府明月滿前川

石倉歷代詩選卷十八

欽定四庫全書

石倉歷代詩選卷十九

明 曹學佺 編

初唐六

盧照鄰

字昇之  
范陽人

結客少年場

長安重遊俠洛陽富才雄  
玉劍浮雲騎金鞭明月弓  
關雞過渭北走馬向關東  
孫賓遙見待郭解暗相通  
不受



千金爵誰論萬里功將軍下天上虜騎入雲中烽火夜  
似月兵氣曉成虹橫行徇知己負羽遠從戎龍旌昏朔  
霧烏陣捲胡風追奔瀚海咽戰罷陰山空歸來謝天子  
何如馬上翁

早渡分水嶺

丁年遊蜀道斑鬢向長安徒費周王粟空彈漢吏冠馬  
蹄穿欲盡貂裘敝轉寒層冰橫九折積石凌七盤重谿  
既下漱峻峰亦上千隴頭聞戍鼓嶺外咽飛湍琴瑟松

風急蒼蒼山月團傳語後來者斯路誠獨難

三月曲水宴

風煙彭澤里山水仲長園由來棄銅墨本自重琴樽高  
情邈不嗣雅道今復存有美光時彥養德坐山樊門開  
芳杜徑室詎桃花源公子黃金勒仙人紫氣軒長懷去  
城市高詠狎蘭蓀連沙飛白鷺孤嶼嘯玄猿日影巖前  
落雲花江上翻興闌車馬散林塘夕鳥喧

和王爽秋夜有所思

寂寂南軒夜悠然懷所知長河落雁苑明月下鯨池鳳  
臺有清曲此曲何人吹丹唇間玉齒妙響入雲涯窮巷  
清風葉空庭寒露枝勞歌欲有和星鬢已將垂

至望喜矚目言懷貽劔外知己

聖圖夷九折神化掩三分緘愁赴蜀道題拙奉虞薰隱  
轉度深谷遙裊上高雲碧流通縈注青山互糾紛澗松  
咽風緒巖花濯露文思北常依馭圖南每喪羣無由召  
宣室何以答吾君

贈益府裴錄事

忽忽歲云暮相望限風煙  
長歌欲對酒危坐遂停弦  
停弦變霜露對酒懷朋故  
朝看桂蟾晚夜聞鴻雁度  
鴻度何時還桂晚不同攀  
浮雲映丹壑明月滿青山  
青山雲路深丹壑月華臨  
耿耿離憂積空令星鬢侵

行路難

君不見長安城北渭橋邊  
枯木橫槎臥古田  
昔日含紅復含紫  
常時留霧亦留煙  
春景春風花似雪  
香車玉輦

恒聞咽若箇遊人不競攀若箇娼家不來折娼家寶袂  
蛟龍帔公子銀鞍千萬騎黃鶯一一向花嬌青鳥雙雙  
將子戲千尺長條百尺枝月桂星榆相蔽虧珊瑚葉上  
鴛鴦鳥鳳凰巢裏雛鷄兒巢傾枝折鳳歸去條枯葉落  
任風吹一朝憔悴無人問萬古摧殘君詎知人生貴賤  
無終始倏忽湏臾難久恃誰家能駐西山日誰家能偃  
東流水漢家陵樹滿秦川行來行去盡哀憐自昔公卿  
二千石咸擬榮華一萬年不見朱唇將白貌惟聞青棘

與黃泉金貂有時須換酒玉塵恒搖莫計錢寄言坐客  
神仙署一生一死交情處蒼龍闕下君不留白鶴山頭  
我應去雲間海上邈難期赤心會合在何時但願堯年  
一百萬長作巢由也不辭

長安古意

長安大道連狹斜青牛白馬七香車玉輦縱橫過主第  
金鞭絡繹向侯家龍銜寶蓋承朝日鳳吐流蘇帶晚霞  
百丈遊絲爭繞樹一羣嬌鳥共啼花啼花戲蝶千門側

碧樹銀臺萬種色復道交窓作合歡雙闕連霓垂鳳翼  
梁家畫閣天中起漢帝金莖雲外直樓前相望不相知  
陌上相逢詎相識借問吹簫向紫煙曾經學舞度芳年  
得成比目何辭死願作鴛鴦不羨仙比目鴛鴦真可羨  
雙去雙來君不見生憎帳額繡孤鸞好取門簾帖雙燕  
雙燕雙飛繞畫梁羅幃翠被鬱金香片片行雲着蟬鬢  
纖纖初月上鴉黃鴉黃粉白車中出含嬌含態情非一  
妖童寶馬鐵連錢娼婦盤龍金屈膝御史府中烏夜啼

廷尉門前雀欲棲  
隱隱朱城臨玉道  
遙遙翠幃沒金堤  
挾彈飛鷹杜陵北  
探丸借客渭橋西  
俱邀俠客芙蓉劍  
共宿娼家桃李蹊  
娼家日暮紫羅裙  
清歌一轉口氛氲  
北堂夜夜人如月  
南陌朝朝騎似雲  
南陌北堂連北里  
五劇三條控三市  
弱柳青槐拂地垂  
佳氣紅塵暗天起  
漢代金吾千騎來  
翡翠屠蘇鸚鵡杯  
羅襦寶帶為君解  
燕歌趙舞為君開  
別有豪華稱將相  
轉日回天不相讓  
意氣由來排灌夫  
專權判不容蕭相  
專權意氣本豪雄



青虬紫燕坐春風自言歌舞長千載自謂驕奢凌五公  
節物風光不相待桑田碧海湏臾改昔時金階白玉堂  
即今惟見青松在寂寂寥寥楊子居年年歲歲一牀書  
獨有南山桂花發飛來飛去襲人裾

劉生

劉生氣不平抱劍欲專征報恩為豪俠死難在橫行翠  
羽裝刀鞘黃金鏤馬纓但令一顧重不忝百身輕

隴頭水

隴板高無極，征人一望鄉。  
關河別去水，沙塞斷歸腸。  
馬繫千年樹，旌懸九月霜。  
從來共鳴咽，皆是為勤王。

巫山高

巫山望不極，望望下朝氛。  
莫辨啼猿樹，徒看神女雲。  
驚濤亂水脈，驟雨暗峰文。  
霑裳即此地，況復遠思君。

芳樹

芳樹本多奇，年華復在斯。  
結翠成新幄，開紅滿故枝。  
風歸花歷亂，日度影參差。  
容色朝朝落，思君君不知。

雨雪曲

虜騎三秋入關雲萬里平雪似胡沙暗冰如漢月明高  
闕銀為闕長城玉作城節旄零落盡天子不知名

昭君怨

合殿恩中絕交河使漸稀肝腸隨玉輦形影向金微漢  
地草應綠胡庭沙正飛願逐三秋雁年年一度歸

折楊柳

倡樓啓曙扉楊柳正依依鶯啼知歲隔條變識春歸露

葉凝秋黛風花亂舞衣攀折將安寄軍中音信稀

梅花落

梅院花初發天山雪未開雪處疑花滿花邊似雪迴因  
風入舞袖雜粉向妝臺匈奴幾萬里春至不知來

關山月

塞垣通碣石虜障抵祈連相思在萬里明月正孤懸影  
移金岫北光斷玉門前寄言閨中婦時看鴻雁天

上之回

回中道路險蕭關烽候多五營屯北地萬乘出西河單  
于拜玉璽天子按雕戈振旅汾川曲秋風橫大歌

紫騮馬

騮馬照金鞍轉戰入臯蘭塞門風稍急長城水正寒雪  
暗鳴珂重山長噴玉難不辭橫絕漠流血幾時乾

戰城南

將軍出紫塞冒頓在烏貪笳喧雁門北陣翼龍城南瑯  
弓夜宛轉鐵騎曉驂驪應須駐白日為待戰方酣

十五夜觀燈

錦里開芳宴，蘭缸艷早年。  
綳彩遙分地，繁光遠綴天。  
接漢疑星落，依樓似月懸。  
別有千金笑，來映九枝前。

入秦川界

隴阪長無極，蒼山望不窮。  
石逕縈疑斷，回流映似空。  
花開綠野霧，鶯轉紫巖風。  
春芳勿遽盡，留賞故同人。

文翁講堂

錦里淹中館，岷山稷下亭。  
空梁無燕雀，古壁有丹青。  
槐

落猶疑市苔深不辨銘良哉二千石江漢表遺靈

相如琴臺

聞有雍容地千年無四隣園院風煙古池臺松檟春雲  
疑作賦客月似聽琴人寂寂啼鶯處空傷遊子神

石鏡寺

古墓芙蓉塔神銘松栢煙鸞沈仙鏡底花沒梵輪前鉢  
衣千古佛寶月兩重圓隱隱香臺夜鐘聲徹九天

辛法司宅觀妓

南國佳人至北堂  
羅薦開長裙隨鳳管  
促柱送鸞杯  
雲光身後落雪態  
掌中迴到愁金谷  
晚不怪玉山頽

春晚山莊率題二首

顧步三春晚  
田園四望通  
遊絲橫菰樹  
戲蝶亂依叢  
竹懶偏宜水  
花狂不待風  
惟餘詩酒意  
當了一生中

田家無四隣  
獨坐一園春  
鶯啼非選樹  
魚戲不驚綸  
山水彈琴盡  
風花酌酒頻  
年華已可樂  
高興復留人

益州城西張超亭觀妓



落日明歌席行雲逐舞人江前飛暮雨梁上下輕塵冶  
服看疑畫妝樓望似春高車勿遽返長袖欲相親

晚渡滹沱敬贈魏大

津谷朝行遠冰川夕望曛霞明深淺浪風捲去來雲澄  
波泛月影激浪聚沙文誰忍仙舟上攜手獨思君

和吳侍御被使燕然

春歸龍塞北騎指雁門垂胡笳折楊柳漢使採燕支戍  
城聊一望花雪幾參差關山有新曲應向笛中吹

七夕泛舟二首

河葭肅徂暑江樹起初涼  
水疑通織室舟似泛仙潢  
連橈渡急響鳴棹下浮光  
日晚菱歌唱風煙滿夕陽  
風杼秋期至鳬舟野望開  
微吟翠塘側延想白雲隈  
石似支機罷槎疑犯宿來  
天潢殊漫漫日暮獨悠哉

大劔送別劉右史

金碧禺山遠關梁蜀道難  
相逢屬晚歲相送動征鞍  
地咽綿川冷雪疑劔閣寒  
倘遇忠孝所為道憶長安

同臨津紀明府孤雁

三秋違北地萬里向南翔  
河洲花稍白關塞葉初黃  
避繳風霜勁懷書道路長  
水流疑箭動月照似弓傷  
橫天無有陣度海不成行  
會刷能鳴羽還赴上林鄉

西使兼送孟學士南遊

地道巴陵北天山弱水東  
相看萬餘里共倚一征蓬  
零雨悲王粲清樽別孔融  
徘徊聞夜鶴悵望待秋鴻  
骨肉胡秦外風塵關塞中  
惟餘劒鋒在耿耿氣成虹

送鄭司倉入蜀

離人丹水北遊客錦城東  
別意還無已離憂自不窮  
隴雲朝結陣江月夜臨空  
關塞疲征馬霜氛落早鴻  
潘年三十外蜀道五千中  
送君秋水曲酌酒對秋風

綿州官池贈別

輶軒遵上國仙珮下靈闕  
樽酒方無地聯綫喜暫攀  
離言欲贈策高辯正連環  
野逕浮雲斷荒池春草斑  
殘花落古樹度鳥入澄灣  
欲叙他鄉別幽谷有綿蠻

還赴蜀中貽示京邑遊好

簾宿花初滿  
章臺柳向飛  
如何正此日  
還望昔多違  
悵別風期阻  
將乖雲會稀  
斂衽辭丹闕  
懸旗陟翠微  
野禽喧戍鼓  
春草變征衣  
回顧長安道  
關山起夕霏

初夏日幽莊

聞有高蹤客  
耿介坐幽莊  
林壑人事少  
風煙鳥路長  
瀑水含秋氣  
垂藤引夏涼  
苗深全覆隴  
荷上半侵塘  
釣渚青鳥沒  
村田白鷺翔  
知君振奇藻  
還嗣海隅芳

山莊休沐

蘭署乘閒日蓬扉狎遁棲  
龍柯踈玉井鳳葉下金堤  
川光搖水箭山氣上雲梯  
亭幽聞唳鶴窓曉聽鳴雞  
玉軫臨風奏瓊漿映月攜  
田家自有樂誰肯謝青谿

山林休日田家

歸休乘暇日饁稼返秋場  
徑草踈王篲巖枝落帝桑  
耕田虞訟寢寢鑿井漢機忘  
戎葵朝委露齊棗夜含霜  
南澗泉初冽東籬菊正芳  
還思北窓下高臥偃羲皇

宴梓州南亭

二條開勝跡大隱叶冲規  
亭閣分危岫樓臺遶曲池  
長薄秋煙起飛梁古蔓垂  
水鳥翻荷葉山蟲咬桂枝  
遊人惜將晚公子愛忘疲  
願得迴三舍琴樽長若斯

首春貽京邑文士

寂寂罷將迎門無車馬聲  
橫琴答山水披卷閱公卿  
忽聞歲云晏倚杖出簷楹  
寒辭楊柳陌春滿鳳凰城  
梅花扶院吐蘭葉繞階生  
覽鏡改容色藏書留姓名  
時來不

假問生死任交情

晚渡渭橋寄示京邑遊好

我行背城闕驅馬獨悠悠  
寥落百年事徘徊萬里憂  
途遙日向夕時晚鬢將秋  
泊泊俯東逝耿耿泣西浮  
長虹掩釣浦落雁下星洲  
草變黃山曲花飛清渭流  
一赴清泥道空思玄灞遊

羈臥山中

臥壑迷時代行歌任死生  
紅顏意氣盡白壁故交輕  
澗



戶無人跡山窓聽鳥聲春色緣巖上寒光入溜平雪盡  
松帷暗雲開石路明夜伴饑飈宿朝隨馴雉行度谿猶  
憶處尋洞不知名紫書常日閱丹藥幾年成倘遇浮丘  
鶴飄飄凌太清

過東山谷口

不知名利險辛苦滯皇州始覺飛塵倦歸來事綠疇桃  
源迷處所桂樹可淹留跡異人間俗禽同海上鷗古苔  
依井被新乳傍崖流野老堪成鶴山神或化鳩泉鳴碧

澗底花落紫巖幽日暮食龜殼天寒御鹿裘不辨秦將  
漢寧知春與秋多謝青谿客去去赤松遊

送幽州陳參軍赴任寄呈鄉曲父老

薊北三千里關西二十年馮唐猶在漢樂毅不歸燕  
人同黃鶴遠鄉共白雲連郭隗池臺處昭王樽酒前故人  
當已老舊壑幾成田西蜀橋應毀東周石尚全塞雲初  
上雁庭樹欲銷蟬送君之舊國揮淚獨潸然

哭金部韋郎中

金曹初受拜玉地始含香翻同五日尹遽見一星亡賀  
客猶扶路哀人遂上堂歌筵長寂寂哭位自蒼蒼歲時  
賓徑斷朝暮雀羅張書留魏主閣魂掩漢家牀徒令永  
平帝千載罷撞郎

登玉清

絕頂橫臨日孤峰半倚天徘徊拜真老萬里見風煙

曲池荷

浮香繞曲岸圓影覆華池常恐秋風早飄零君不知

含風蟬


高情臨爽月急響逐秋風獨有危冠意還將衰鬢同

登封大酺歌

日觀仙雲隨鳳輦天門瑞雪照龍衣繁絃綺席方終夜  
妙舞清歌歡未歸

九月九日登玄武山旅眺

九月九日眺山川歸心歸望積風煙他鄉共酌金花酒  
萬里同悲鴻雁天



石倉歷代詩選卷十九

欽定四庫全書

集部

石倉歷代詩選卷二十一

詳校官庶吉士臣范逢恩

侍讀臣孫球覆勘

總校官進士臣朱鈐

校對官助教臣卜維吉

謄錄監生臣周光顯

欽定四庫全書

石倉歷代詩選卷二十

明 曹學佺 編

初唐七

駱賓王

在江南贈宋五之問

井絡雙源濬潁陽九派長淪波通地穴輸委下歸塘別  
島籠朝蜃連洲擁夕漲韞珠澄積潤讓壁動浮光浮光

凝折水積潤踈圓吐玉輪涵地開劒匣連星起風煙標  
迥秀英靈信多美懷德踐遺芳端操慙謀已謀已謬觀  
光牽迹強恓惶揆拙迷三省勞生昧兩忘彈隨空被笑  
獻楚自多傷一朝殊默語千里易炎涼炎涼幾遷貿川  
陸疲臻湊積水架吳濤連山橫楚岫風月雖殊昔星河  
猶是舊姑蘇望南浦卽鄆通北走北走平生親南浦別  
離津瀟湘一起忽洞庭多苦辛秋江無綠芷寒汀有白  
蘋采之將何遺故人漳水濱漳濱已遼遠江潭未旋返



為聽短歌行當想長洲苑露金薰菊岸風珮搖蘭坂蟬  
鳴稻葉秋雁起蘆花晚晚秋雲日明亭臯風露清獨負  
平生氣重牽搖落情占星非聚德夢月詎懸名寂寥傷  
楚奏淒斷泣秦聲秦聲懷舊里楚奏悲無已郢路少知  
音叢臺富奇士溫輝凌愛日壯氣驚寒水一顧重風雲  
三冬足文史文史盛紛綸京洛多風塵猶輕五車富未  
重一囊貧李仙非易託蘇鬼尚難因不惜勞歌盡誰為  
聽陽春

北眺春陵

攬轡疲宵邁驅馬倦晨興既出封泥谷還過避雨陵山  
明行照上谿宿密雲蒸登高徒欲賦詞殫獨撫膺

叙寄員半千

薄宦三河道自負十餘年不應驚若礪祗為直如弦坐  
歷山川險吁嗟陵谷遷長吟空抱膝短翮詎冲天魂歸  
滄海上望斷白雲前釣名勞拾紫隱迹自談玄不學多  
能聖徒思鴻寶仙斯志良難已此道豈徒然嗟為刀筆

吏恥從繩墨牽岐路情難狎人倫地本偏長揖謝時事  
獨往訪林泉寄言二三子生死不來旋

行軍中行路難

君不見玉關塵色暗邊庭銅鞮雜虜寇長城天子按劍  
徵餘勇將軍受脰事橫行七德龍韜開玉帳千里龜壘  
動金鉦陰山苦霧埋高壘交河孤月照連營連營去去  
無窮極擁旆遙遙過絕國陣雲朝結晦天山寒沙夕漲  
迷踈勒龍鱗水上開魚貫馬首山前振鵬翼長驅萬里

誓祈連分麾三令武功宣百發烏號遙碎柳七尺龍文  
迥照蓮春來秋去移灰琯蘭閨柳市芳塵斷雁門迢遞  
尺書稀鴛鴦被相思雙帶緩行路難行路難誓令氛祲靜  
皋蘭但使封侯龍額貴詎隨中婦鳳樓寒

帝京篇

山河千里國城闕九重門不覩皇居壯安知天子尊皇  
居帝里崤函谷鶉野龍山侯甸服五緯連影集星躔八  
水分流橫地軸秦塞重關一百二漢家離宮三十六桂

殿欽崙對玉樓椒房窈窕連金屋三條九陌麗城隈萬  
戶千門平旦開複道斜通鳩鵲觀交衢直指鳳凰臺  
履南宮入簪纓北闕來聲明冠寰宇文物象昭回鈎陳  
肅蘭祀壁沼浮槐市銅羽應風迴金莖承露起校文天  
祿閣習戰昆明水朱戟抗平臺黃扉通戚里平臺戚里  
帶崇墉炊金饌玉待鳴鐘小堂綺帳三千戶大道青樓  
十二重寶蓋雕鞍金絡馬蘭窓繡柱玉盤龍繡柱璇題  
粉壁映鏘金鳴玉王侯盛王侯貴人多近臣朝遊北里

暮南鄰陸賈分金將讌喜陳遵投轄正留賓趙李經過  
密蕭朱交結親丹鳳朱城白日暮青牛紺幘紅塵度俠  
客珠彈垂楊道倡婦銀鈎采桑路倡家桃李自芳菲京  
華遊俠盛輕肥延年女弟雙飛入羅敷使君千騎歸同  
心結縷帶連理織成衣春朝桂樽樽百味秋夜蘭燈燈  
九微翠幌珠簾不獨映清歌寶瑟自相依且論三萬六  
千是寧知四十九年非古來榮利若浮雲人生倚伏信  
難分始見田實相傾奪俄聞衛霍有功勲未厭金陵氣

先開石櫛文朱門無復張公子  
灞亭誰畏李將軍相顧  
百齡皆有待居然萬化咸應改  
桂枝芳氣已銷亡栢梁  
高宴今何在春去春來苦自馳  
爭名爭利徒爾為久留  
郎署終難遇空掃相門誰見知  
當時一旦擅豪華自言  
千載長驕奢倏忽搏風生羽翼  
須臾失浪委泥沙黃雀  
徒巢桂青門遂種瓜黃金銷鑠  
素絲變一貴一賤交情  
見紅顏宿昔白頭新脫粟布衣  
輕故人故人有湮淪新  
知無意氣灰死韓安國羅傷翟  
廷尉已矣哉歸去來馬

卿辭蜀多文藻揚雄仕漢乏良媒三冬自矜誠足用十  
年不調幾遄迴汲黯薪逾積孫弘閣未開誰惜長沙傳  
獨負洛陽才

疇昔篇

少年重英俠弱歲賤衣冠既託寰中賞方承膝下歡遨  
遊灞水曲風月洛城端且知無玉饌誰肯逐金丸金丸  
玉饌盛繁華自言輕侮李倫家五霸爭馳千里馬三條  
競驚七香車掩映飛軒乘落照差池步障引朝霞池中



舊水如懸鏡屋裏新妝不讓花意氣風雲倏如昨歲月  
春秋屢迴薄上苑頻經柳樹飛中園幾見梅花落當時  
門客今何在疇昔交朋已踈索莫教憔悴損容儀會得  
高秋雲霧廓淹留坐帝鄉無事積炎涼一朝被短褐六  
載奉長廊賦文慙昔馬執戟歎前揚揮戈出武帳荷筆  
入文昌文昌隱隱皇城裏由來奕奕多才子潘陸詞鋒  
絡繹飛張曹翰苑縱橫起卿相未曾識王侯寧見擬垂  
釣甘成白首翁負薪何處逢知己判將運命賦窮通從

來奇舛任西東不應永棄同芻狗且復飄飄類轉蓬容  
鬢年年異春華歲歲同榮親未盡禮狗主欲申功脂車  
秣馬辭鄉國縈轡西南使叩焚玉壘銅梁不易攀地角  
天涯眇難測鶯嚶蟬吟有悲望鴻來雁度無音息陽關  
積霧萬里昏劒閣連山千種色蜀路何悠悠岷峰阻且  
脩迴腸隨九折迸淚連雙流寒光千里暮霞氣二江秋  
長途看束馬平水且沈牛華陽舊地標神制石鏡蛾眉  
直秀麗諸葛才雄已號龍公孫躍馬輕稱帝五丁卓犖

多奇力四士英靈富文藝雲氣橫開八陣形橋影遙分  
七星勢川平煙霧開遊戲錦城隈墉高龜望出水淨雁  
丈迴尋姝入酒肆訪客上琴臺不識金貂重偏惜玉山  
顏他鄉冉冉消年月帝里沈沈限城闕不見猿聲助客  
啼惟聞旅思將花發我家迢遞關山裏關山迢遞不可  
越故園梅柳尚有餘春來勿使芳菲歇解鞅欲言歸執  
袂愴多違北梁俱握手南浦共沾衣別情傷去蓋離念  
惜徂輝知音何所託木落雁南飛回來望平陸春來酒

應熟相將茵閣臥青谿且用藤杯泛黃菊十年不調為  
貧賤百日屢遷隨倚伏祇為須求負郭田使我再干州  
縣祿百年鬱鬱少騰遷萬里遙遙入鏡川涖江沸潮衝  
白日淮海長波接遠天叢竹凝朝露孤山起暝煙賴有  
邊城月常伴客旌懸東南美箭稱吳會名都隱軫三江  
外塗山執玉應昌期曲水開襟重文會仙鏑流音鳴鶴  
嶺寶劒分輝落蛟瀨未看白馬對蘆芻且覺浮雲似車  
蓋江南節序多文酒屢經過共踏春江曲俱唱采菱歌

舟移疑入鏡，棹舉若乘波。風光無限極，歸櫂礙池荷。  
眺聽煙霞正，流盼即從王。事歸艫轉芝，田花月屢徘徊。  
金谷佳期重，遊衍登高北。望嗤梁叟憑，軾西征想潘掾。  
峰開華岳聳，疑蓮水激龍門急。如箭人事謝，光陰俄遭霜。  
露侵偷存七尺影，分沒九泉深。窮途行泣玉，憤路未藏金。  
茹荼空有嘆，懷橘獨傷心。年來歲去成銷鑠，懷抱心期漸寥落。  
掛冠裂冕已辭榮，南畝東臯事耕鑿。賓階客院常踈散，蓬徑柴扉終寂寞。  
自有林泉堪隱棲，何必山

中事丘壑我住青門外家臨素滄濱遙瞻丹鳳闕斜望  
黑龍津荒衢通獵騎窮巷抵樵輪時有桃源客來訪竹  
林人昨夜琴聲奏悲調旭日含顰不成笑果乘驄馬發  
驚書復道郎官稟綸誥治長非罪曾縲紲長孺然灰也  
經溺高門有閹不圖封峻筆無聞斂敷妙適離京兆謗  
還從御史彈炎威資夏景平曲况秋翰畫地終難入書  
空自不安吹毛未可待搖尾且求飡丈夫坎壈多愁疾  
契濶迤邐盡今日慎罰寧憑兩造辭嚴科直掛三章律

鄒衍銜悲繫燕獄李斯抱怨拘秦桎不應白髮頓成絲  
直為黃沙暗如漆紫禁終難叫朱門不易排驚魂聞葉  
落危魄遂輪埋霜威遙有厲雪杜遂無階含冤欲誰道  
飲氣獨居懷忽聞驛使發關東傳道天波萬里通洄鱗  
去轍還遊海幽禽釋網便翔空舜澤堯曦方有極讒言  
巧佞儻無窮誰能跼蹐依三輔會就商山訪四翁

艷情代郭氏答盧照鄰

迢迢芊路望芝田眇眇函關限蜀川歸雲已落涪江外

還雁應過洛水漣洛水傍連帝城側帝宅層甍垂鳳翼  
銅駝路上柳千條金谷園中花幾色柳葉園花處處新  
洛陽桃李應芳春妾向雙流窺石鏡君住三川守玉人  
此時別離那堪道此日空牀對芳沼芳沼徒遊比目魚  
幽徑還生拔心草流風迴雪儻便娟驥子魚文實可憐  
擲果河陽君有分貨酒成都妾亦然莫言貧賤無人重  
莫言富貴應須種綠珠猶得石崇憐飛燕曾經漢皇寵  
良人何處醉縱橫直如循默守空名倒提新練成慊慊



翻將故劒作平平離前吉夢成蘭兆別後啼痕上竹生  
別日分明相約束已取宜家成誠勗當時擬弄掌中珠  
豈謂先摧庭際玉悲鳴五里無人問腸斷三聲誰為續  
思君欲上望夫臺端居懶聽將雛曲沈沈落日向山低  
簷前歸燕竝頭栖抱膝當窻看夕兔側耳空房聽曉雞  
舞蝶臨階祇自舞啼鳥逢人亦助啼獨坐傷孤枕春來  
悲更甚峨眉山上月如睂濯錦江中霞似錦錦字迴文  
欲贈君劒壁層峰自糾紛平江淼淼分清浦長路悠悠

間白雲也知京洛多佳麗也知山岫遙虧蔽無那短封  
即踈索不在長情守期契傳聞織女對牽牛相望重河  
隔淺流誰分迢迢經兩歲誰能脈脈待三秋情知唾井  
終無理情知覆水也難收不復下山能借問更向盧家  
字莫愁

從軍行

平生一顧重意氣溢三軍野日分戈影天星合劒文弓  
弦抱漢月馬足踐胡塵不求生入塞惟當死報君

王昭君

斂容辭豹尾，絨怨度龍鱗。  
金鈿明漢月，玉筍染胡塵。  
妝鏡菱花暗，愁眉柳葉顰。  
惟有清笳曲，時聞芳樹春。

春夜韋明府宅宴

酌桂陶芳夜，披薜嘯幽人。  
雅琴馴魯雉，清歌落苑塵。  
宿雲低迥蓋，殘月下虛輪。  
幸此承恩洽，聊當故鄉春。

夏日遊山家同夏少府

返照下層岑，物外狎招尋。  
蘭徑薰幽佩，槐庭落暗金。  
谷

卷二十一  
靜風聲徹山空月色深一遣樊籠累惟餘松桂心

冬日宴

二三物外友一百杖頭錢賞洽袁公地情披樂令天促  
席鸞觴滿當鑪獸炭然何須攀桂樹逢此自留連

遊靈公觀

靈峰標勝境神府枕通川玉殿斜連漢金堂迥架煙斷  
風疎晚竹流水切寒弦別有青門外空懷玄圃仙

陪潤州薛司空丹徒桂明府遊招隱寺

共尋招隱寺初識戴顓家  
還依舊泉壑應改昔雲霞  
綠竹寒天笋紅蕉臘月花  
金繩倘留客為繫日光斜

同辛簿簡仰酬思玄上人林泉四首

聞君招隱地髣髴武陵春  
緝芰知還楚披榛似避秦  
崩查年祀積幽草歲時新一謝  
滄浪水安知有逸人  
芳晨臨上月幽賞狎中園  
有蝶堪成夢無羊可觸藩  
忘懷南澗藻蠲思北堂萱  
坐歎華滋歇思君誰為言

林泉恣探歷風景暫徘徊  
客有遷鶯處人無結駟來  
聚

花如薄雪沸水若輕雷今日徒招隱終知異鑿坏  
俗遠風塵隔春還初服遲林疑中散地人似上皇時芳  
杜湘君曲幽蘭楚客詞山中有春草長似寄相思

秋日餞陸道士陳文林

青牛遊華嶽赤馬走吳宮玉柱辭鴻怨金壘浮蟻空日  
霽靖陵雨塵起洛陽風惟當玄度月千里與君同

送鄭少府入遼共賦俠客遠從戎

邊烽驚榆塞俠客度桑乾柳葉開銀鑄桃花照玉鞍滿

月臨弓影連星入劍端不學燕丹客空歌易水寒

送費六還蜀

星樓望蜀道月峽指吳門萬行流別淚九折切驚魂雪  
影含花落雲陰帶葉昏還愁三徑晚獨對一清尊

秋日送侯四

我留安豹隱君去學鵬搏岐路分襟易風雲促膝難夕  
漲流波急秋山落日寒惟有思歸引悽斷為君彈

秋日送尹大赴京

尹大官三冬懸暢指蘭臺而拾青薛六郎四海情深  
飛桂樽而舉白于時兔苑東上龍火西流劒彩沈  
波碎楚蓮於秋水金輝照岸秀陶菊於寒堤既切  
送歸之情彌軫窮途之感重以清江帶地聞吳會於  
星津白雲在天望長安於日路人之情也能不悲乎  
雖道術相望叶神交於靈府而風煙懸隔貴申心於  
翰林請振詞鋒用開筆海人為四韻用慰九秋

掛瓢余隱舜負鼎爾干湯竹葉離樽滿桃花別路長低



河耿秋色落月抱寒光素書如可嗣幽谷竚賓行

秋日送別

寂寥心事晚搖落歲時秋共此傷年髮相看惜去留當  
歌應破涕哀命返窮愁別後能相憶東陵有故侯

別李嶠

芳樽徒自滿別恨轉難勝客似遊江岸人疑上灞陵寒  
更承夜永涼景向秋澄離心何以贈自有玉壺冰

在兗州餞宋五之問

淮沂泗水地梁甫汶陽東別路青驪遠離樽綠蟻空柳  
寒凋密翠棠晚落疎紅別後相思曲悽斷入琴風

送劉少府遊越州

一丘余枕石三越爾懷鉛離亭分鶴蓋別岸指龍川背  
夏蟬聲斷來寒雁影連如何溝水上悽斷聽離絃

至分水戍

行役總離憂復此愴分流濺石迴湍咽縈叢曲澗幽陰  
崖常結晦宿莽競含秋況乃霜晨早寒風入戍樓

出石門

層巖遠接天絕嶺上棲煙松低輕蓋偃藤細弱絲懸石  
明如掛鏡苔分似列錢暫策為龍杖何處得神仙

望鄉夕泛

歸懷刺不安促榜犯風瀾落宿含樓近浮月帶江寒喜  
逐行前至憂從望裏寬今夜南枝鵲應無繞樹難

月夜有懷簡諸同病

閒庭落景盡踈簾夜月通山靈響似應水淨望如空棲

枝猶繞鵲遵渚未來鴻可歎高樓婦悲思杳難終

憲臺出紮寒夜有懷

獨坐懷明發長謠苦未安自應迷北叟誰肯問南冠  
生死交情異殷憂歲序闌空餘朝夕鳥相伴夜啼寒

詠美人在天津橋

美女出東隣容與在天津動衣香滿路移步襪生塵  
水  
下看妝影眉頭畫月新寄言曹子建箇是洛川神

在獄詠蟬

西陸蟬聲唱南冠客思侵那堪玄鬢影來對白頭吟露  
重飛難進風多響易沈無人信高潔誰謂表予心

同張二詠雁

唼藻蒼江遠銜蘆紫塞長霧深迷曉景風急斷秋行陣  
照通宵月書封幾夜霜無復能鳴分空知愧稻梁

秋風

紫陌炎氛歇青萍晚吹浮亂竹搖疎影縈池織細流飄  
香曳舞袖滯粉泛妝樓不分君恩絕紈扇曲中秋

秋露

玉闕寒氣早金塘秋色歸  
泛掌光逾淨添荷滴尚微  
變霜凝曉液承月委圓輝  
別有吳臺上應濕楚臣衣

秋水

貝闕寒流徹玉輪秋浪清  
圖雲錦色淨寫月練花明  
泛曲鶻弦動隨軒鳳轄驚  
惟當御溝上悽斷送歸情

秋螢

玉虬分靜夜金螢照晚涼  
含輝疑泛月帶火怯凌霜  
散

彩縈虛牖飄花繞洞房下帷如不倦當解惜餘光

秋菊

擢秀三秋晚開芳十步中分黃俱笑日含翠共搖風碎  
影涵流動浮香隔岸通金翹徒可泛玉瑩竟誰同

秋雁

聯翩辭海曲遙曳指江干陣去金河冷書歸玉塞寒帶  
月凌空易迷煙逗浦難何當同顧影刷羽泛清瀾

棹歌行

寫月圖黃罷凌波拾翠通鏡花搖芰日夜麝入荷風葉  
密舟難蕩蓮踈浦易空鳳媒羞自託鴛翼恨難窮秋帳  
燈光翠倡樓粉色紅相思無別曲併在棹歌中

海曲書情

薄遊倦千里勞生負百年未能槎上漢詎肯劒遊燕白  
雲照春海青山橫曙天江濤讓雙壁渭水擲三錢坐惜  
風光晚長歌獨塊然

蓬萊鎮



旅客春心斷邊城夜望高野樓疑海氣白鷺似江濤結  
綬疲三入承冠泣二毛將飛憐弱羽欲濟乏輕舠賴有  
陽春曲窮愁且代勞

和李明府

傳聞葉縣履飛向洛陽城馳道臨層掖津門對小平霞  
殘疑製錦雲度似飄纓藻掞潘江澈塵虛范甑清詎憐  
衝斗氣猶向匣中鳴

春晚從李長史遊開道林故山

幽尋極幽壑春望陟春臺雲光棲斷樹靈影入仙杯古  
藤依格上野徑約山隈落葉翻風去流鶯滿樹來興闌  
荀御動歸路起浮埃

晚渡黃河

千里尋歸路一葦亂平原通波連馬頰迸水急龍門照  
日榮光淨驚風瑞浪翻棹唱臨風斷樵謳入聽喧岸迥  
秋霞落潭深夕霧繁誰堪逝川上日暮不歸魂

憩田家

轉蓬勞遠役披薜下田家山形類九折水勢急三巴懸  
梁接斷岸澁路擁崩杳霧巖淪曉魄風淑漲寒沙心迹  
一朝舛關山萬里賒龍章徒表越閩俗本殊華旅行悲  
泛梗離贈折踈麻惟有寒潭菊獨似故園花

晚度天山有懷京邑

忽上天山路依然想物華雲疑上苑葉雪似御溝花行  
歎戎麾遠坐憐衣帶賒交河浮絕塞弱水浸流沙旅思  
徒漂梗歸期未及瓜寧知心斷絕夜夜泣胡笳

夕次蒲津

二庭歸望斷萬里客心愁山路猶南屬河源自北流晚  
風連朔氣新月照邊秋竈火通軍壁烽煙上戍樓龍庭  
但苦戰燕頷會封侯莫作蘭山下空令漢國羞

送吳七遊蜀

日觀分齊壤星橋抵蜀門桃花嘶別路竹葉瀉離樽夏  
盡蘭猶茂秋新柳尚繁霧銷山望迥風高野聽喧勞歌  
徒欲奏贈別竟無言惟有當秋月空照野人園

西行別東臺詳正學士

意氣坐相親  
關河別故人  
客似秦川上  
歌疑易水濱  
塞荒行辨玉  
臺遠尚名輪  
洩井懷邊將  
尋源重漢臣  
上苑梅花早  
御溝楊柳新  
只應持此曲  
別作邊城春

夏日夜憶張二

伏枕憂思深  
擁膝獨長吟  
烹鯉無尺素  
筌魚勞寸心  
踈麻空有折  
芳桂湛無斟  
廣庭含夕氣  
閒宇澹虛陰  
織蟲垂夜砌  
驚鳥棲暝林  
驩娛百年促  
羈病一生侵  
詎堪孤月

夜流水入鳴琴

在軍中贈先還知己

蓬轉俱行役  
瓜時獨未還  
魂迷金闕路  
望斷玉門關  
獻凱多慙霍  
論封幾謝班  
風塵催白首  
歲月損容顏  
落雁低秋塞  
驚鳬起暝灣  
胡霜如劒鏑  
漢月似刀鐮  
別後邊庭樹  
相思幾度攀

浮槎

昔負千尋質  
高臨九仞峰  
貞心凌晚桂  
勁節掩寒松  
忽

值風颺折坐為波浪衝摧殘空有恨擁腫遂無庸渤海  
三千里泥沙幾萬重似舟飄不定如梗泛何從仙客終  
難託良工豈易逢徒懷萬乘器誰為一先容

晚泊河曲

三秋倦行役千里泛歸潮通波竹箭水輕舸木蘭橈金  
堤連曲岼貝闕影浮橋水淨千年近星飛五老遙疊花  
開宿浪浮葉下涼颺浦荷踈晚葍津柳漬寒條恓惶勞  
梗泛淒斷倦蓬飄仙槎不可託河上獨長謠

早發淮口望盱眙

養蒙分四瀆習坎奠三荆  
徙帝留餘地封王表舊城  
岿昏涵蜃氣潮滿應雞聲  
洲迴連沙靜川虛積溜明  
一朝從捧檄千里倦懸旌  
背流桐栢遠逗浦木蘭輕  
小山迷隱路大塊切勞生  
惟有貞心在獨映寒潭清

宿溫城望軍營

虜地寒膠折邊城夜柝聞  
兵符闕帝闕天策動將軍  
塞靜胡笳徹沙明楚練分  
風旗翻翼影霜劒轉龍文  
白羽



搖如月青山斷若雲煙踈疑卷幔塵滅似銷氛投筆懷  
班業臨戎想顧勲還應雪漢恥持此報明君

過故宋

舊國十年盡荒城四望通雲浮非隱帝日舉類遊童綺  
琴朝化洽祥石夜論空馬去遙奔鄭蛇分近帶豐池文  
斂束水竹影漏寒叢園兔承行月川禽避斷風故宋誠  
難定從梁事未工惟當過周客獨愧吳臺空

邊夜有懷

漢地行逾遠燕山去不窮城荒猶築怨碣毀尚銘功古  
戍煙塵滿邊庭人事空夜闌明隴月秋塞急胡風倚伏  
良難定榮枯豈易通旅魂勞泛梗離恨斷征蓬蘇武封  
猶薄崔駰宦不工惟餘北叟意欲寄南飛鴻

詠懷

少年識事淺不知交道難一言芬若桂四海臭如蘭寶  
劍思存楚金鉞許報韓虛心徒有託循迹諒無端太息  
關山險吁嗟歲月闌忘機殊會俗守拙異懷安阮籍空

長嘯劉琨獨未懽  
十步庭芳斂三秋  
隴月團槐踈朝盡  
落松晚夜凌寒悲  
調弦中急窮愁醉  
裏寬莫將流水引  
空向俗人彈

春日離長安客中有懷

年華開早律霽色蕩芳晨  
城闕千門曉山河四望春  
御溝通太液戚里對平津  
寶瑟調中婦金罍引上賓  
劇談推曼倩驚坐揖陳遵  
意氣一言合風期萬里親  
自惟安直道守拙忌因人  
談器非先木圖榮異後薪  
柳榆慙路鬼

憔悴切波臣玄草終疲漢烏裘幾滯秦生涯無歲月岐  
路有風塵還嗟太行道處處白頭新

幽繫書情通簡知已

昔歲逢楊意觀光賁楚材穴疑丹鳳起塲似白駒來一  
命淪驕餌三緘慎禍胎不言勞倚伏忽此邁遭迴驄馬  
刑章峻蒼鷹獄吏猜絕縑非易辨疑壁果難裁揆畫慙  
周道端憂滯夏臺生涯一滅裂岐路幾徘徊青陸春芳  
動黃沙旅思催圓扉長寂寂踈網尚恢恢覆盆徒望日

蟄戶未驚雷霜歇蘭猶敗風多木屢摧地幽蠶室閉門  
靜雀羅開自憫秦冤痛誰憐楚奏哀漢陽窮鳥客梁甫  
臥龍才有氣還衝斗無時會鑿坯莫言韓長孺長作不  
然灰

久戍邊城有懷京邑

擾擾風塵地遑遑名利途盈虛一易舛心迹兩難俱弱  
齡小山志寧期大丈夫九微光貴玉千仞忽彈珠棘寺  
遊三禮蓬山簞八儒懷鉛慙後進投筆願前驅北走非

通趙西之似化胡錦車朝促候刁斗夜傳呼戰士青絲  
絡將軍黃石符連星入寶劒半月上雕弧拜井開踈勒  
鳴桴動密須戎機習短蔗袂袂靜長榆季月炎初盡邊  
亭草早枯層陰籠古木窮色變寒蕪海鶴聲嘹唳城烏  
尾畢逋葭繁秋引色桂滿夕輪虛行役風霜久鄉園夢  
想孤灞池遙夏國秦海望陽紆沙塞三千里京城十二  
衢楊溝連鳳闕槐路擬鴻都璧殿規宸象金堤法斗樞  
雲浮西北葢月照東南隅寶帳垂連理銀牀轉輓轡廣

筵留上客豐饌引中厨漏緩金徒箭嬌繁玉女壺秋濤  
飛喻馬春水泛仙艫意氣風雲合言忘道術趨共矜名  
已泰詎肯沫相濡有志慙雕朽無庸類散樗關山暫起  
忽形影歎艱虞結網空知羨圖榮豈自誣忘情同塞馬  
北德類宛駒隴阪肝腸絕陽關亭堠迂迷魂驚落雁離  
恨斷飛鳧春去榮華盡年來歲月無邊愁傷郢調鄉思  
繞吳歆河氣通中國山途限外區相思若可寄冰津有  
銜蘆

在軍登城樓

城上風威冷江中水氣寒戎衣何日定歌舞入長安

於易水送人

此地別燕丹壯髮上衝冠昔時人已沒今日水猶寒

送別

寒更承夜永涼夕向秋澄離心何以贈自有玉壺冰

石倉歷代詩選卷二十